

09/09/1997

Pelabur ASB sambut baik cadangan kerajaan

KUALA LUMPUR, Isnin - Orang ramai, terutama pelabur Amanah Saham Bumiputera (ASB), menyambut baik cadangan untuk menaikkan had maksimum pelaburan ASB daripada RM100,000 kepada RM200,000.

Mereka meminta kerajaan supaya melaksanakan cadangan itu segera bagi membolehkan pelabur meningkatkan tabungan di samping mengurangkan pergantungan kepada modal asing.

Pelabur ASB di sini, Nordin Sario, 37, berkata cadangan itu memberi peluang lebih baik kepada pelabur untuk menambah simpanan dalam ASB.

"Ini membuktikan kerajaan prihatin dalam usaha membantu meningkatkan taraf hidup masyarakat Bumiputera," katanya.

Beliau mengulas pengumuman Timbalan Perdana Menteri, Datuk Seri Anwar Ibrahim mengenai perkara itu pada hari terakhir Perhimpunan Agung Umno 1997 di Pusat Dagangan Dunia Putra, semalam.

Anwar mengumumkan perkara itu ketika menggulung perbahasan pada perhimpunan itu.

Menurut Anwar, cadangan itu sudah dipersetujui Perdana Menteri, Datuk Seri Dr Mahathir Mohamad untuk menjana kekuatan dana tempatan bagi meningkatkan tabungan dan mengurangkan pergantungan kepada modal asing.

Menjelaskan langkah itu pada sidang akhbar, Dr Mahathir berkata, pelaksanaan itu akan dibuat secepat mungkin dan kerajaan dijangka mendapat dana sejumlah RM5 bilion sekiranya 50,000 pelabur melabur RM200,000.

(END)